

Haeuxringz Hawj Ndwi

免费午餐

Vunz naeuz lajmbwn mbouj miz byawz hawj gwnringz ndwi, hoeng hagdangz dou cix miz haeuxringz hawj dou gwnndwi, moix daengz mwh haihaeux, “haihaeux lo! Haihaeux lo! Youh ndaej gwnringz ndwi lo, neix dwg cwngfuj bued ngaenz hawj dou gwnringz ndwi!” Gij sing neix boux riengz boux gangj. Dauqdaej dwg mbouj dwg o?

Laxlawz, haeuxringz gwnndwi dwg cwngfuj vihliux gemjmbaeu cienzgwnringz gyoengq hagseng lajmbanj bienbik, fat cienz hawj gyoengq hagseng ranz liz hagdangz gyae haenx banringz youq hagdangz gwnringz.

Haeuxringz hawj ndwi ndaej soiz cienzgwnhaeux lwghag lajmbanj, beijlumj: Gaxgonq mboujmiz haeuxringz hawj ndwi seiz, mbanj hagseng lajmbanj bienbik ranz liz hagdangz gyae youq hagdangz ninz haenx, aenvih ranz gungz gingciengz gyau mbouj hwnj cienzgwnhaeux, cungj ngaiz dungxiek. Seizneix miz haeuxringz hawj gwnndwi le, ndaej soiz ndawranz hagseng lai lo.

Haeuxringz hawj ndwi mboujdanh ndaej soiz gyoengq boux hagseng lajmbanj bienbik ninz youq hagdangz haenx, hix ndaej soiz gyoengq hagseng



ranz liz hagdangz gyaez hoeng youh mbouj ndaej youq hagdangz ninz haenx, beijlumj: Miz haeuxringz hawj ndwi le, gyoengq hagseng ranz gyae haenx banringz hix ndaej louz youq hagdangz gwnringz, youq ndaw gyausiz boujcung ndang-rengz, ciep roengzdaeuj lajbyonghngoengz miz rengz hwnjdangz. Gaxgonq mbouj miz haeuxringz hawj gwn ndwi, gyoengq hagseng ranz gyae haenx ngoenzngoengz banringz cungj ganj baema ranz gwnringz le caiq muengzhoebhoeb ganj daeuj hagdangz, yienghneix gig sai rengz, lajbyonghngoengz mbouj miz saekdi cingsaenz, mbouj miz sim hwnjdangz dingq gangj goq, hagsib yaugoj gig mbouj ndei; miz di doengzhag ranz saedcaih daiq gyae lo, banringz baema gwn mbouj gib, banhaet couh daiq haeux daeuj hagdangz, hoeng daengz banringz seiz, haeux gaenq gyoet lo, gwn haeuxgyoet dungx mbouj ndeiyouq, lajbyonghngoengz hix mbouj miz cingsaenz, hwnj mbouj baenz dangz.

Linghvaih, haeuxringz hawj ndwi lij hawj dou ndaej lienh gag guh saeh, youq hagdangz, dou ndaej hablex faenboiq seizgan hagsib, lienhdang, neix doiq dou daengzcog majhung le ok sevei bae guhhong gig miz bangcoh.

Haeuxringz hawj ndwi, sawj dou majhung engq vaiq; haeuxringz hawj ndwi, sawj ranz lajmbanj bienbik ndaej gemjmbaeu diuzrap; haeuxringz hawj ndwi, sawj gyoengq hagseng mbouj ndaej youq hagdangz ninz haenx miz rengz; haeuxringz hawj ndwi, sawj dou ndaej youq hagdangz gag lienh swheij. Haeuxringz hawj ndwi, caen dwg aen hengzdoengh hungmbwk he, docih cwngfuj gvensim dou, haeuxringz hawj ndwi buenx gou majhung! Gou gyaez haeuxringz hawj ndwi!

(haj nienzgaep Liuz Mingz)

Lumj Sei Lumj Veh Dwg Seizcou

如诗如画的秋天

Seizcou, dwg aen geiqciet saek lai he, dwg aen geiqciet lumj sei lumj veh he, dwg aen geiqciet fungsou he. Seizcou baez daengz, haujlai doxgaiq cungj youq ndaw geiqciet neix baij ok gij gyaeunde iakmaenh swheij.

Youq ndaw seizcou lai saek lai yiengh neix, haujlai va gyaeunde cungj doxciengj hai angi. Vagut, gveiqva, valwgbaenq…… Gij rang gveiqva rox caenx haeuj ndaeng daeuj, vunzlaux naeuz gveiqva rang ndaej cib leix gyae, cijaeu mbup mbat he couh daengx ndang soengswt, lumzgeiq naetnaiq. Gveiqva duj va miz haj roek limq va, gij va dingzlai dwg saekhenjgim, saekhenjoiq, saekhou sam cungj saek neix. Gangj daengz saek va, vagut cij suenq dwg lai saek lai yiengh, saekceb, saekhou, saekmaeq, saeknding lai daengz geq mbouj liux, gyoengqde lumj angjfwngz neix menhmenh ajhai youq ndaw rumz riuho.

Youq ndaw aen geiqciet neix, lwgmak hix mbouj gamsim doeklaeng, cungj siengj nyoengx daeuj yawj aen biengz raeuz. Makleizsan daj heuloeg bienq baenz henjnding, gij naed nohmak baenz naed baenz naed ndongqrikrik lumj naed raemxraiz nei, hawj vunz sij mbouj ndaej haeb de. Gwn amq he, couh lumj miz geu raemxmbouq vandiemz he lae roengz sim bae. Makleizsan cawz le feihdauh dwgbak le, lij baenz guh yw, gij naeng de ndaej fuengz oksiq, dwg cungj mak gig ndei ndeu. Makmbae hix henj lo, seizneix makmbae

miz song cungj, cungj he unq cungj he ndongj, cungj ndongj haenx gwn hwnjdaej youh byot youh sangj, cungj unq haenx lumj aen youh aen daengloengz iq, youh lumj aen naj launyaenq iq nei, gwn haeuj bak gig raeuz, couh lumj vad vazbanj ityiengh vad haeuj bak bae, vad roengz sim bae. Maklaeq hix baenz lo, naeng de miz caengz bwnnyungz he, bok naeng le youh miz caengz byuk ndongjgyatgyat. De couh lumj boux cansw giengiengz he, henhoj gij noh de, mbouj hawj vunz gwn de. Bok caengz byuk haenx le, lij miz caengz biux he, bok caengz biux haenx le cij raen gij noh henjrwgrw de.

Seizcou caen dwg aen geiqciet lai saek lai yiengh he ha.

(roek nienzgaep Hing Youjginh)



Cauj Majlingzsuz

炒马铃薯

Majlingzsuz dwg cungj doxgaiqgwn gig bingzciengz he, byawz cungj gwn gvaq, hoeng goulau mbouj miz geijlai boux doengzhag rox cauj aen byaek neix bw. Vihliux guhbaenz aen yinvu lauxsae roengzhawj neix, ngoenzneix gou gaen daxboh hagsib cauj majlingzsuz.

Gou naeuz hawj daxboh naeuz lauxsae roengz yinvu heuh hag cauj majlingzsuz le, daxboh angq dwk son gou. Daxboh hainduj son gou cauj majlingzsuz lo, de sien dawz geij aen majlingzsuz cuengq youq gwnz daizheng, swiq caxbyaek le, ronq majlingzsuz, cij dingqnyi raq sing gvaekgvaekgvaek maedmaed he, yaepyet majlingzsuz couh bienq baenz diuz lo, yienghneix liuh couh bwh ndei lo.

Miz liuh le, couh hainduj cauj lo, daxboh dawz rek hwnj gwnz feiz bae, caj gij raemx ndaw rek hawq le, daxboh ndingq di youz roengz rek bae. De doq guh doq naeuz hawj gou: “Ndingq youz seiz aeu siujsim, mboujnex youz rox sinz hwnj ndang daeuj. Ndingq youz hix mbouj naengz ndingq daiq lai, ndingq lai majlingzsuz daiq youz mbouj ndeigwn.” Gangj sat, de yawj gij youz ndaw rek, gamjdaengz miz di aeng le, dawz aen buenz cang gij majlingzsuz ronq ndei haenx baez ndingq, cij dingqnyi “ca” sing ndeu, majlingzsuz cienzbouh ndingq roengz rek bae lo. Daxboh youh aeu gucanj gig vaiq canj dwk, cijraen gaiq gen daxboh gingz hwnj gingz roengz, gaiq gucanj hix youq ndaw rek canj swix canj gvaz, gou yaengx lwgfwngzmeh haenh daxboh. Daxboh cauj geij faen cung le, naeuz gou: “Mwngz hix yawj yaep he lo, vaiq daeuj doenghfwngz caujcauj.” Gangj le, ndenq fagcanj hawj gou. Youq ndaw fwngz gou, fagcanj couh mbouj dingqgangj lo, de lumj lwngyez manzgyaengj he, yaep he gvaq mbiengj neix, yaep he gvaq mbiengj haenx, majlingzsuz cauj mbouj ndei, sinz ok rek daeuj mbouj noix. Daxboh raen gou fwngz mbouj gvai geijlai, youh caiq son gou, ciemhciemh dwk, fwngz gou beij haxbaenh sug lai lo.

Gou caeuj daxboh doengzcaez okrengz, majlingzsuz gig vaiq couh cauj baenz lo, gou aeu buenz daeuj cang dawz hwnj daiz, cimz amq he, caen rang hw! Gij byaek swheij cauj couh dwg ndeigwn, mboujnex vunz vihmaz naeuz “cihgeij doenghfwngz, miz gwn miz daenj” ne!

Gou gwn dwk gwn dwk, sawqmwh gamjdaengz cihgeij yienznaeuz hag rox cauj majlingzsuz lo, hoeng cauj de caen mbouj yungzheih, gou cib’ it bi neix ndawde, mbouj rox gwn gvaq geijlai majlingzsuz bohme hawj haenx, gyoengqde caen dwgrengz ha!

(haj nienzgaep Du Lingz)